

მუხლი 13. სტუდენტის სტატუსის შეჩერება და აღდგენა

1. სტუდენტის სტატუსის შეჩერების საფუძველია:

- ა) პირადი განცხადება (მიზეზის მითითების გარეშე);
- ბ) უცხო ქვეყანაში, უმაღლეს საგანმანათლებლო დაწესებულებაში სწავლა, გარდა გაცვლითი საგანმანათლებლო პროგრამის ფარგლებში სწავლისა;
- გ) ორსულობა, მშობიარობა, ბავშვის მოვლა;
- დ) ჯანმრთელობის მდგომარეობის გაუარესება;
- ე) ფინანსური დავალიანება;
- ვ) აკადემიური შვებულება;
- ზ) აკადემიური (პროგრამის და საგნების არ არჩევა) რეგისტრაციის გაუვლელიობა.

2. სტუდენტის სტატუსის შეჩერების მაქსიმალური ვადაა 5 წელი.

3. სტატუსის აღდგენის შემთხვევაში სტუდენტი სწავლას აგრძელებს იმ სემესტრიდან, რომლიდანაც შეუჩერდა სტუდენტის სტატუსი.

4. სწავლის საფასურის გადაუხდელობის შემთხვევაში, სტუდენტის სტატუსის შეჩერება სტუდენტს არ ათავისუფლებს სწავლის საფასურის გადახდის ვალდებულებისაგან.

5. სტუდენტის სტატუსის შეჩერებიდან 5 წლის შემდეგ პირს უწყდება სტუდენტის სტატუსი.

6. სტატუსის აღდგენის შემთხვევაში სტუდენტი სწავლას აგრძელებს იმ სემესტრიდან, რომლიდანაც შეუჩერდა სტუდენტის სტატუსი (თუ სტუდენტს არ გააჩნია აკადემიური დავალიანება). უნივერსიტეტში სტატუსშეჩერებული სტუდენტის აღდგენა ხორციელდება სემესტრის დაწყებამდე ან სემესტრის დაწყებიდან 1 ნოემბრამდე (შემოდგომის სემესტრში) და 1 აპრილამდე (გაზაფხულის სემესტრში). თუ სტატუსის შეჩერებამდე სტუდენტს ჩაბარებული აქვს შუალედური შეფასების კომპონენტები (შუალედური გამოცდები, პრეზენტაცია და სხვ.), მისი აღდგენა შესაძლებელია დასკვნით გამოცდამდე, სემესტრის განმავლობაში ნებისმიერ დროს (თუ სტუდენტი მიღებული შუალედური შეფასებების გაუმჯობესების მიზნით არ განაცხადებს წერილობით მოთხოვნას). ფინანსური დავალიანების გამო სტატუსშეჩერებული სტუდენტის აღდგენა ხორციელდება დავალიანების სრულად დაფარვის შემთხვევაში.

მუხლი 14. სტუდენტის სტატუსის შეწყვეტა

1. სტუდენტის სტატუსის შეწყვეტის საფუძველია:

- ა) უნივერსიტეტში სწავლის პერიოდში 5 წელზე მეტი ვადით სტატუსის შეჩერება;
- ბ) საგანმანათლებლო პროგრამის დასრულება მოცემულ საფეხურზე;
- გ) პირადი განცხადება;
- დ) შესაბამისი საგანმანათლებლო პროგრამის მოთხოვნების შეუსრულებლობა აკადემიური ხარისხის მოსაპოვებლად დადგენილ ვადებში;
- ე) უნივერსიტეტის ეთიკის კოდექსით, უნივერსიტეტის შინაგანაწესითა და დისციპლინური პასუხისმგებლობის ნორმებით გათვალისწინებული, სტუდენტის სტატუსთან შეუთავსებელი ქმედების განხორციელება, ფაკულტეტის საბჭოს გადაწყვეტილების საფუძველზე;
- ე) სხვა საგანმანათლებლო დაწესებულებაში გადასვლა;
- ზ) გარდაცვალება;
- თ) კანონმდებლობით დადგენილი სხვა შემთხვევა.

2. სტუდენტის სტატუსის შეწყვეტის შესახებ სამართლებრივი აქტით გათვალისწინებული სამართლებრივი შედეგები დგება ბრძანების გამოცემიდან თორმეტი თვის შემდეგ. დროის ამ მონაკვეთში სტუდენტის სტატუსი ითვლება შეჩერებულად და სტუდენტი უფლებამოსილია, ისარგებლოს მობილობის უფლებით.

3. სტუდენტის სტატუსის შეწყვეტის შემთხვევაში, მისი ხელახლა მოპოვება დასაშვებია კანონმდებლობით დადგენილი წესით.

4. სტუდენტის სტატუსის შეწყვეტის ან შეჩერების შესახებ ინდივიდუალურ სამართლებრივ აქტს დეკანის წარდგინებით გამოსცემს უნივერსიტეტის რექტორი.

5. პირს, რომელმაც ვერ დაასრულა შესაბამისი საგანმანათლებლო პროგრამა და შეუწყდა სტუდენტის სტატუსი, ეძლევა სათანადო მოწმობა.